

TUISCINT NÍOS
FEARR AR CHEARTA
AGUS DHUALGAIS
NA BPÁIRTITHE
LENA MBAINEANN
FAOI DHLÍ NA
GCUIDEACHTAÍ A
CHUR CHUN CINN

02.

CAIBIDIL 2 TUISCINT NÍOS FEARR AR CHEARTA AGUS DHUALGAIS NA BPÁIRTITHE LENA MBAINNEANN FAOI DHLÍ NA GCUIDEACHTAÍ A CHUR CHUN CINN

Intreoir

Soláthraítear sa chaibidil seo sonraí faoi na príomhstraitéisí arna saothrú agus faoi na gníomhaíochtaí arna ndéanamh ag an Oifig i rith na bliana faoi athbhreithniú ar mhaithe leis an sprioc sonraithe thuas a chur chun cinn. Mar achoimre, áiríodh na nithe seo a leanas leis na straitéisí agus na gníomhaíochtaí sin:

- rinneadh foilseacháin agus ábhar treorach eile a fhorbairt agus a fhógairt;
- chuathas i mbun raon gníomhaíochtaí for-rochtana, lena n-áirítear soláthar láithreoireachtaí, freastal ar sheimineáir agus ar thaispeántais agus déileáil le fiosruithe ginearálta faoi dhlí na gcuideachtaí ó bhail den phobal;
- tathantaíodh feabhsúcháin reachtaíochta agus bheartais; agus
- rinneadh caidreamh le páirtithe leasmhara seachtracha a bhainistiú agus a fhorbairt.

Foilseacháin agus gníomhaíochtaí for-rochtana

Foilseacháin

Déanann an Oifig faisnéis agus treoir a fhorbairt agus a fhoilsiú ó am go chéile ar mhaithe le páirtithe leasmhara. De ghnáth, tarlaíonn foilsiú an ábhair sin mar thoradh ar an achtú piosa nua reachtaíochta nó mar fhreagairt do shaincheisteanna arna sainaitheint trí ghnéithe eile d'obair na hOifige (m.sh. ar ghnéithe de dhlí na gcuideachtaí is dealraitheach a bheith mar chúis le leibhéal shuntasacha neamhchomhlíonta). I rith na bliana, d'eisigh an Oifig 10 bhfoilseachán nua (2011: 11). Leagtar sonraí faoi na foilseacháin sin amach sa Tábla thíos.

Tábla 4

Foilseacháin a eisíodh - 2012⁹

Dáta a Eisíodh	Foilseacháin
Eanáir 2012	Athbhreithniú Bhliantúil: 2011
Eanáir 2012	Idirbhearta a mBíonn Stiúrthóirí Páirteach Iontu – Treoir Thapa
Aibreán 2012	Cuideachtaí Bainistíochta Úinéirí Réadmhaoine Tithíochta – Lámhleabhar (2ú eagrán)
Aibreán 2012	Cuideachtaí Bainistíochta, Treoir Dlí na gCuideachtaí do Úinéirí Réadmhaoine
Aibreán 2012	Tuairisc alt 56 – Fógra Eolais
Bealtaine 2012	Tuairisciú Iníúcháir – Cad a Tharlaíonn i nDhiall Sin?
Meitheamh 2012	Tuarascáil Bhliantúil OSFC: 2011
Lúnasa 2012	Acht na gCuideachtaí (Leasú) 2012 – Fógra Eolais
Meán Fómhair 2012	IR ¹⁰ 304 de 2012 – Fógra Eolais
Meán Fómhair 2012	IR 308 of 2012 – Fógra Eolais

⁹ Tá na foilseacháin go léir ar fáil ag www.osfc.ie

¹⁰ Ionstraim Reachtaí

Eisíodh dara heagrán de Lámhleabhar Dhlí na Cuideachta i ndáil le Cuideachtaí Bainistíochta Úinéirí Réadmhaoine Tithíochta i mí Aibreáin 2012. Freagraíodh san eagrán nua seo den chuid is mó don tionchar a bhí ag an Acht um Fhorbairtí Ilaonad, 2011, agus d'fhorbairtí agus leasuithe reachtaíochta éagsúla eile a tháinig aníos ó foilsíodh an chéad eagrán i 2008.

D'eisigh an Oifig foilseachán breise ina sraith de Threoracha Tapa i mí Eanáir 2012. Pléadh san foilseachán le hIdirbhearta a bhaineann le Stiúrthóirí, ar topaic í a leanann uirthi a bheith i measc na saincheisteanna is coitianta a thuairiscíonn iniúcháirí. Amhail deireadh na bliana, bhí roinnt Treoracha Tapa sa bhreis á gcur chun críche. Táirgtear an treoir ar fad den chineál sin i gcomhar leis an Áisíneacht Náisiúnta Litearthachta d'Aosaigh ("NALA") agus, mar sin de, fuair sí an stampa 'Béarla Soiléir', a chuireann stíl scríbhneoireachta shoiléir, chomair agus shimplí in iúl, rud a ligeann don léitheoir an teachtaireacht a thuiscint go héasca.

Faoi mar a fhorhmáinítear i gCaibidil 3 den Tuarascáil seo, tá iniúcháirí ina bhfoinse thábhachtach de thuairiscí reachtúla chuig an Oifig. Toisc gurb amhlaidh sin, déanann an Oifig teagmháil leis an ngairm ar bhonn leanúnach. Sa chomhthéacs sin, foilsíodh roinnt cáipéisí a ceapadh chun cabhrú le hiniúcháirí cloí lena gcuid oibleagáidí tuairiscithe reachtúla. I mí na Bealtaine 2012, d'eisigh an Oifig cáipéis dar teideal "*Tuairisc ó Iniúcháirí: A dtarlaíonn dá bharr*" ina leagtar amach próiseas inmheánach na hOifige tar éis tuairisc a fháil. Chabhraigh na Comhlachtaí Aitheanta Cuntasóireachta ("CAC")¹¹ leis an Oifig an foilseachán seo a dhréachtú agus, ina dhiaidh sin, aird na n-iniúcháirí a tharraingt air.

I mí Aibreáin 2012, d'fhoilsigh an Oifig sonraí faoi na háisc sin ina ndearnadh cinntí chun leachtaitheoirí a scaoileadh, go buan nó go sealadach, óna n-oibleagáidí imeachtaí srianta a thionscnamh in aghaidh na stiúrthóirí cuideachtaí dócmhainneacha ainmnithe. Rinneadh na cinntí sin tar éis athbhreithniú ar thuairiscí leachtaitheoirí faoi mar atá ag teastáil faoi alt 56 den AFDC. Déantar tuilleadh sonraí faoi phróiseas alt 56 a leagan amach i gCaibidil 3 den Tuarascáil seo.

Foilsíonn an Oifig Fógraí Eolais ó am go chéile maidir le reachtaíocht nua-achtaithe ar mhaithe le páirtithe leasmhara. Sa chomhthéacs sin, d'fhoilsigh an Oifig trí cháipéis den chineál sin i rith na bliana, is é sin ar na hábhair seo a leanas:

- Acht na gCuideachtaí (Leasú), 2012, a leasaigh na Rialacháin a ligeann do mháthairchuideachtaí leas a bhaint as GAAP¹² SAM tríd an amscála a shíneadh go dtí an 31 Nollaig 2020;
- IR 304 de 2012, a mhéadaigh na tairseacha Cláir Chomhardaithe agus láimhdeachais, rud a ligeann do chuideachtaí príobháideacha leas a bhaint as díolúintí áirithe nochtá ina ráitis airgeadais; agus
- IR 308 de 2012, a mhéadaigh na tairseacha Cláir Chomhardaithe agus láimhdeachais, rud a ligeann do chuideachtaí príobháideacha leas a bhaint as díolúine iniúchta.

De bhreis ar an méid roimhe seo, d'eisigh an Oifig corradh le 20,000 cóip dá foilseachán éagsúla i rith 2012. Go háirithe, bhí an-mheas ar Leabhair Eolais nuashonraithe na hOifige, agus ar shraith mhéadaithe na hOifige de Threoracha Tapa freisin. Trí chomhaontú leis an Oifig, thug an Oifig um Chlárú Cuideachtaí ("OCC") tuairim is leathchuid de na cáipéisí seo do dhaoine a bhí i mbun cuideachta nua a chlárú¹³. Rinneadh an chuid eile a eisiúint go príomha mar fhreagairt d'éileamh poiblí, bíodh sé ag imeachtaí, taispeántais nó láithreoireachtaí nó mar raibh daoine ag dul i dteagmháil leis an Oifig go díreach.

¹¹ Tá sé CAC ann, is é sin:

- Comhlachas na gCuntasóirí Deimhniche Cairte (CCDC);
- Institiúid na gCuntasóirí Deimhniche Poiblí in Éirinn (ICDPÉ);
- Institute of Chartered Accountants in England & Wales (ICAEW);
- Institiúid na gCuntasóirí Cairte in Éirinn (ICCE);
- Institute of Chartered Accountants of Scotland (ICAS); agus
- Institiúid na gCuntasóirí Corpraithe Poiblí (ICCP).

¹² Cleachtais Chuntasaíochta a bhfuil Glacadh leo

¹³ De ghnáth, eisíonn an CRO Treoir Thapa OSFC faoi stiúrthóirí cuideachta mar chuid dá paca mar a thugtar do chuideachtaí nua-chorpraithe.

Seimineáir agus taispeántais

Gné thábhachtach de straitéis tathanta na hOifige is ea a clár for-rochtana. Is éard atá i gceist anseo, i measc nithe eile, ná an soláthar láithreoireachtaí agus óráidí do ghrúpaí páirtithe leasmhara, chomh maith le freastal ar thaispeántais agus ar imeachtaí ar dóigh dóibh gné amháin nó níos mó ná gné amháin de spriocphobal na hOifige a chur san áireamh. Shainaithe an Oifig sainghrúpaí áirithe a bheith i measc a spriocphobail, lena n-áirítear:

- daoine atá breithniú á dhéanamh acu ar chorprú nó a chorpóraigh gnóthais le déanaí;
- gairmithe i mbun comhairle a chur ar fáil do chuideachtaí agus do stiúrthóirí cuideachta atá in ann an teachtaireacht chomhlíonta a chur in iúl do chliant agus, tríd sin, clúdach na hOifige a leathnú go mór;
- mic léinn atá cláraithe faoi láthair i gcláir ghnó ag leibhéal fochéimithe nó iarchéimithe, a n-éireoidh formhór díobh ina stiúrthóirí cuideachtaí nó ina gcomhairleoirí gairmiúla sa deireadh; agus
- an earnáil pobail agus an earnáil dheonach, ina mbíonn easpa eolais ar dhlí na gcuideachtaí óna nádúr de ghnáth agus, dá bhrí sin, a bhaineann leas as treoir de ghnáth.

I rith na bliana, sholáthair foireann na hOifige 47 láithreoireacht (2011: 53) do lucht éisteachta de thart ar 1,700 duine san iomlán. Bhí sé suntasach go háirithe, sa tréimhse dheireanach den bhliain, go ndearna an Oifig teagmháil le roinnt Comhairlí Cathrach agus Contae chun leagan amach a dhéanamh ar dhlí na gcuideachtaí agus ar na saincheisteanna lena mbaineann a d'fhéadfadh teacht aníos i gcomhthéacs na ngníomhaíochtaí a dhéanann siad agus na seirbhísí a chuireann siad ar fáil faoi seach trí mheán na gcuideachtaí. Táthar ag súil go leanfar leis an rannpháirtíocht seo i 2013. I rith na bliana, rinneadh ionadaíocht don Oifig ag 16 thaispeántas agus imeacht (2011: 15). Déantar sonraí faoi na láithreoireachtaí a soláthraíodh agus faoi na taispeántais ar freastalaíodh orthu faoi seach i rith na bliana a leagan amach in Aguisín 2 leis an Tuarascáil seo.

Feabhsúcháin reachtaíochta agus bheartais a thathant

Mar gheall ar a sainordú um chomhlíonadh a chur chun cinn agus um neamhchomhlíonadh dhlí na gcuideachtaí a fhorfheidhmiú, tá an Oifig in ann peirspictíocht eolasach a chur ar fáil maidir le plé agus díospóireachtaí beartais a tharlaíonn ag leibhéal náisiúnta agus ag leibhéal an AE i ndáil le dlí na gcuideachtaí agus le topaicí lena mbaineann. Sa chomhthéacs sin, rinne an Oifig aighneachtaí mar fhreagairt do roinnt tograí beartais i rith na bliana. Leagtar tuilleadh sonraí amach thíos.

Bille na gCuideachtaí

I rith na bliana, lean an Roinn ar aghaidh lena cuid oibre ar thabhairt chun críche an Bhille (arb é an príomhchuspóir a ghabhann leis ná an corp reatha de dhlí na gcuideachtaí atá i 16 cheann de chuid Achtanna an Oireachtais¹⁴ faoi láthair, chomh maith le roinnt mhaith Ionstraimí Reachtúla agus Rialachán). Áirítear leis an mBille, áfach, roinnt leasuithe molta agus breiseáin mholta le dlí na gcuideachtaí mar atá sé faoi láthair.

Foilsíodh an dara cuid (nó Colún B) den dréacht-Bhille ar láithreán gréasáin na Roinne i mí na Bealtaine 2012, agus chuaigh foireann na Roinne ina dhiaidh sin i mbun athbhreithnithe ar an dréacht-reachtaíocht ar fad d'fhonn breithniú a éascú ar aon saincheisteanna arna n-ardú ag páirtithe leasmhara maidir leis an dréacht arna fhoilsiú, agus d'fhonn freagairt d'aon athruithe reachtaíochta idir an dá linn.

Go háirithe, chuaigh an Oifig i mbun leasuithe molta le Cuid 2 den Bhille, ina bpléitear leis an tiontú cuideachtaí príobháideacha go cuideachtaí poiblí teoranta, agus leasuithe molta le Cuid 22, ina bpléitear le cuideachtaí seachtracha¹⁵. De bhreis ar na sainchúrsaí seo, chuir an Oifig a tuairimí in iúl don Roinn freisin maidir leis na gnéithe sin den Bhille a phléann leis an gclárú molta leachtaitheoirí. D'fhoilsigh an Roinn an dréacht deiridh den Bhille i mí na Nollag 2012¹⁶.

¹⁴ Comhthéarma do Thithe Uachtaracha agus Íochtaracha na Parlaiminte

¹⁵ Is éard atá i gcuideachtaí seachtracha ná coincheap nua ina gcuirfean san áireamh a bhfuil sainithe faoi láthair in Achtanna na gCuideachtaí mar bhraintí, chomh maith le cuideachtaí eachtracha atá áit ghnó sa Stát á bunú acu.

¹⁶ Is féidir an Bille a rochtain ag <http://www.oireachtas.ie/parliament/oireachtasbusiness/billslegislation/bills/>

Togra Choimisiún an AE le haghaidh Treoir Chuntasaíochta nua

I mí Eanáir 2012, d'eisigh Coimisiún an AE páipéar ina moltar leasuithe áirithe le dhá Threoir Chuntasaíochta de chuid an AE¹⁷. Ina freagairt, d'eisigh OSFC rabhadh ginearálta i gcomhthéacs féachaint le hionstraimí reachtaíochta ar nós na dTreochara a úsáid chun déileáil le saincheistanna cuntasaíochta toisc go bhfuil na huirlisí sin, de réir a nádúir, mall le forbairt agus réasúnta dolúbtha i gcás ina dtiocfadh gá lena n-oiriúnú nó lena n-athrú aníos go mear.

An méid sin ráite, thacaigh an Oifig go leathan le tograí a ceapadh chun an t-ualach riaracháin ar ghnóthais bheaga, ar nós leathnú na díolúine iniúchta go grúpaí beaga cuideachtaí, a mhaolú. Mar sin féin, mar gheall ar a méid agus ar an tionchar féideartha, mhol an Oifig nach mbeadh sé iomchuí an díolúine seo a leathnú go grúpaí meánmhéide cuideachtaí. Rinne an Oifig moltaí de chineál teicniúil maidir leis an dóigh a mbeadh ar aon tograí, mar is gá, idirghníomhú le caighdeáin chuntasaíochta reatha agus mholta sa todhchaí.

Dréacht-Rialachán maidir le riachtanais mholta i ndáil leis an iniúchadh reachtúil ar Aonáin Leasa Phoiblí (“ALPanna”) agus Dréacht-Treoir maidir le hiniúchtaí reachtúla ar chuntais bhliantúla agus chomhdhlúite

I rith na bliana, agus tar éis dó gabháil do mhórchleachtadh comhairliúcháin, d'eisigh Coimisiún an AE pacáiste (ina raibh dréacht-Rialachán agus dréacht-Treoir faoi seach) d'athchóirithe molta ar iniúchadh reachtúil agus ar an margadh iniúchta laistigh den AE. Cé gur thacaigh an Oifig le cuid mhór d'athchóirithe molta an Choimisiúin, chuir sí agúis in iúl faoi chinn áirithe de na tograí. Ar na tograí ar thacaigh an Oifig leo, bhí:

- an tabhairt isteach riachtanais chaighdeánaigh um choinneáil cáipéisí, ar mhol an Oifig gur cheart dóibh a bheith i bhfeidhm ar feadh tréimhse sé bliana in ionad na cúig bliana a bhí molta; agus
- an sannadh dearbhairthe cáilíochta maidir le hiniúcháirí ALPanna don Údarás Inniúil lena mbaineann.

Chuir an Oifig buarthaí in iúl faoi thograí a bhaineann leis na nithe seo a leanas:

- an deighilt gníomhaíochtaí iniúchta agus neamhinúchta, a d'fhéadfadh a bheith neamhfhéideartha le cur chun feidhme ar bhonn an AE amháin agus a bhféadfadh a bheith ina dídhreasú d'iontrálaithe nua; agus
- an togra le haghaidh iniúchadh níos lú d'aonáin bheaga agus mheánmhéide a mheas an Oifig a bheith mar chúis le laghdú a chur ar thuiscint ar a bhfuil i gceist in iniúchadh agus mar chúis le mearbhall faoi obair an iniúcháir.

Comhairliúchán an Choimisiúin Eorpigh maidir le todhchaí dhlí cuideachtaí an AE

Ina freagairt don cháipéis seo ag a bhfuil téamaí leathana, chuir an Oifig a creideamh in iúl gur cheart do Choimisiún an AE díriú ar pharaiméadair leathana lena gcur i bhfeidhm ar fud an AE a leagan amach, le linn dó solúbthacht dhóthanach a chur ar fáil ag leibhéal an Bhallstáit, in ionad dul i mbun tuilleadh oibre ar struchtúir chorparáideacha arna sainiú ag an AE. Maidir le cuideachta ag aistriú a hoifige cláraithe, thathantaigh an Oifig nár cheart na haistrithe sin a cheadú i gcás inar cuireadh cuideachta faoi leachtú nó inar ábhar d'imeachtaí a bhaineann le dócmhainneacht iad.

Bille um Rialáil Seirbhísí DLÍ

Agus aird á tabhairt aici ar rith an Bhille seo tríd an Dara Céim i nDáil Éireann¹⁸, chuir an Oifig an tuairim in iúl nach bpléifeadh an Bille, arna dhréachtú, go hiomchuí leis an tsaincheist um rialú na gcostas dlí arb ionann é agus cúrsa tábhachtach don Oifig. Go háirithe, thug an Oifig faoi deara nár freagraíodh sa Bhille do thograí arna ndéanamh ag grúpaí oibre i 2005 agus i 2006 faoi seach chun na críche seo a leanas:

- ba cheart measúnú a dhéanamh ar chostais go príomha trí thagairt d'obair a rinneadh iarbhrí agus go hiomchuí; agus

¹⁷ Treoir 78/660/CEE agus Treoir 83/349/CEE

¹⁸ Teach Íochtarach na Parlaiminte

- ba cheart freagracht as costais chánach a shannadh d'Oifig atá ar leith ó Óifig atá freagrach as cúrsaí rialála.

Leathnú molta na nAchtanna um Shaoráil Faisnéise

Mar atá sí achtaithe faoi láthair, is amhlaidh an toradh comhcheangailte atá ar reachtaíocht um shaoráil faisnéise ("SF") agus um dhlí na gcuideachtaí nach bhfuil ach na gnéithe riaracháin d'oibríochtaí na hOifige amháin faoi réir Saoráil Faisnéise. De réir bheartas an Rialtais, ba cheart do gach Gníomhaireacht Stáit agus Oifig Stáit a bheith faoi réir SF go hiomlán agus, sa chomhthéacs sin, bhí teagmháil á déanamh ag an Oifig leis an Roinn agus leis an Roinn Caiteachais Phoiblí agus Athchóirithe faoi seach amhail deireadh na bliana.

Comhairliúcháin eile

I rith na bliana, thug an Oifig tuairimí faoi roinnt de chomhairliúcháin eile freisin, lena n-áirítear an ghairm ón gCoimisiún um Athchóiriú an Dlí ar aighneachtaí maidir le hábhar a chlár oibre nua. Ba éard a bhí i bhfreagairt na hOifige don iarratas sin go bunúsach ná aithris na cáipéise a cuireadh faoi bhráid na Roinne Dlí agus Cirt agus Athchóirithe Dlí mar fhreagairt dá plécháipéis dar teideal "*Coireacht Eagraithe agus Coireacht an Bhóna Bháin*"¹⁹.

Rannchuidiú le freagairtí na Roinne

De bhreis ar roinnt freagairtí a eisiúint ar a ceart féin, chuir an Oifig ábhar chuig an Roinn chun cuidiú léi a freagairtí do raon cúrsaí a cheapadh, lena n-áirítear Dréacht-Treoir Réamheolaire an AE agus an Bille um Cheartas Coiriúil (Éilliú).

Caidrimh le páirtithe leasmhara seachtracha a bhainistiú agus a fhorbairt

Ar mhaithe lena cuspóirí reachtúla agus lena spriocanna gaolmhara a chur chun cinn, féachann an Oifig le caidrimh láidre agus éifeachtacha a choinneáil le raon príomhpháirtithe leasmhara. De bhreis ar an bpobal i gcoitinne, áirítear le príomhpháirtithe leasmhara na hOifige an tOireachtas, an tAire, an Roinn, comhlachtaí reachtúla/rialála eile agus iad siúd a sholáthraíonn seirbhísí gairmiúla do chuideachtaí agus do stiúrthóirí cuideachtaí agus d'oifigigh chuideachtaí. Déantar idirghníomhaíochtaí na hOifige le príomhpháirtithe leasmhara áirithe i rith na bliana a achoimriú thíos.

Comhaltaí den Oireachtas

Faigheann an Oifig seo teachtaireachtaí ó chomhaltaí den Oireachtas ó am go chéile. De ghnáth, is éard atá sna teachtaireachtaí seo léiriú ar bhuairt faoi cé acu atá Achtanna na gCuideachtaí á sárú ag páirtithe ar leith nó nach bhfuil nó baineann siad le cásanna faoi athbhreithniú. Cé go bhfuil an Oifig an-srianta maidir leis an bpointe ar ar féidir léi freagairt do na teachtaireachtaí sin de bhua a hoibleagáidí rúndachta reachtúla, déanann sí a dícheall cibé cúnaimh is féidir léi a chur ar fáil do Theachtaí²⁰ agus do Sheanadóirí.

An Roinn Post, Fiontar agus Nuálaíochta

Lean an Oifig uirthi teagmháil a dhéanamh le comhghleacaithe sa Roinn ar fud na bliana ar chúrsaí leasa choitinn. Rinneadh ionadaíocht don Oifig ag cruinnithe bainistíochta na Roinne agus, lasmuigh de na struchtúir fhoirmiúla sin, déantar teagmháil rialta de réir mar is gá.

OCC (an Oifig um Chlárú Cuideachtaí)

Toisc gurb ise an stór poiblí faisnéise faoi chuideachtaí agus faoi oifigigh chuideachtaí, imríonn an OCC ról ríthábhachtach i dtacú leis an Oifig ina cuid oibre. De bhreis ar a teacht le chéile ar chúrsaí leasa choitinn, cuireann foireann an OCC fianaise ar fáil ar bhonn rialta d'imeachtaí OSFC agus, nuair a shaináithnítear iad, agus ar shárúithe prima facie Achtanna na gCuideachtaí.

¹⁹ Pléadh an cháipéis sin go cuimsitheach i dTuarascáil Bhliantúil 2010, atá ar fáil ag www.osfc.ie

²⁰ Comhaltaí de Theachtaí foicharach na Parlaiminte

Biúró an Gharda um Imscrúdú Calaoise (“BGIC”)

Dá dtagraítear i gCaibidil 1 den Tuarascáil seo, áirítear le líon foirne na hOifige roinnt Gardaí. Tá na Gardaí sin ar iasacht ó BGIC. Tá dlúthchaidreamh na hOifige leis an nGarda Síochána, agus le BGIC go háirithe, ríthábhachtach ina hobair forfheidhmithe choiriúil. Sa chomhthéacs sin, buaileann an Oifig le bainisteoireacht BGIC ar bhonn rialta maidir le cúrsaí leasa choitinn.

Údarás Maoirseachta Iniúchta agus Cuntasaíochta na hÉireann (“ÚMICÉ”)

De réir fhorálacha Acht na gCuideachtaí (Iniúchadh agus Cuntasaíocht), 2003, (“Acht 2003”), is ball de ÚMICÉ é an Stiúrthóir agus tá an ceart aige/aici chun ball a ainmniú chuig a Bhord Stiúrthóirí. Bhí an t-iarStiúrthóir, go dtí gur fógraíodh a scor beartaithe, ina bhall den Bhord. Ag an am sin, roghnaigh an t-iarStiúrthóir éirí as an mBord agus an tUas. Conor O'Mahony, Ceann Seirbhísí Dócmhainneachta agus Seirbhísí Corparáideacha, a ainmniú chuig an mBord.

Cé gur bheartaigh an Stiúrthóir reatha, ar a cheapadh, dul isteach sa Bhord, b'amhlaidh comhdhéanamh an Bhoird ag an am sin gur cuireadh cosc air amhlaidh a dhéanamh de bhua fhorálacha Acht 2003 (a chuireann teorainn le líon na gcuntasóirí a fhéadfaidh fónamh ar an mBord ag aon am ar leith). Faoi na cúinsí, agus ar iarratas an Stiúrthóra, chuir an tUas. O'Mahony in iúl go raibh sé toilteanach leanúint air fónamh ar an mBord.

I rith na bliana, tháinig Bord ÚMICÉ le chéile 9 n-uaire. D'fhreastail ainmní OSFC ar 8 gcinn de na cruinnithe sin. Beidh Tuarascáil Bhliantúil 2012 ÚMICÉ²¹ ar fáil ar a láithreán gréasáin a luaithe is a chuirfidh an tAire faoi bhráid an Oireachtais í.

De bhreis ar an gcaidreamh reachtúil mar atá leagtha amach thuas, rinne an Oifig teagmháil rialta le ÚMICÉ i rith na bliana maidir le cúrsaí leasa choitinn.

An Grúpa Athbheithnithe Dlí Cuideachta (“GADC”)

Is comhlacht comhairleach bunaithe go reachtúil don Aire ar chúrsaí a bhaineann le dlí cuideachta é an GADC. Tá an Stiúrthóir ina bhall den GADC agus déantar ionadaíocht don Oifig ag cruinnithe iomlánacha agus ag cruinnithe Coistí a mbaineann a gcuid oibre lena sainchúram. I rith na bliana, chuir an GADC a chlár oibre do 2010-2012 i gcrích agus chuir sé tús le hobair ar chlár nua²². Rannchuidigh an Oifig leis na saincheistanna seo a leanas, i measc nithe eile, mar a bhí breithnithe ag an GADC:

An chailliúint cánacha muiníneacha ag teacht as dlíteanas teoranta a mhí-úsáid

Tar éis dó breithniú a dhéanamh ar an gcúrsa, mhol an GADC gur cheart méadú a chur ar na híosriachtanais chaipitil reatha atá i bhfeidhm maidir le stiúrthóirí a bhí faoi réir orduithe srianta a bheith ag cuideachtaí ach cheap sé go sáródh na himpleachtaí praiticiúla ar leasú le dlí cuideachta a éilíonn ar stiúrthóirí a gcúrsaí cánach a bheith i gceart acu na buntáistí agus go mbeadh siad ina gcúis le hualach riaracháin neamhriachtanach.

Glacadh le samhail UNCITRAL²³ ar dhócmhainneacht trasteorann

Chuaigh an GADC i mbun próiseas comhairliúcháin le páirtithe leasmhara a raibh ina chúis le hardú roinnt buarthaí teicniúla a cinneadh go raibh tuilleadh imscrúdaithe ag teastáil uathu. Dá réir sin, d'iarr an Grúpa ar an Aire breithniú na saincheiste seo a leathnú go dtí an chéad chlár oibre eile de chuid an GADC.

Ionadaíocht do chuideachta os comhair na gcúirteanna

Tar éis dó eolas a fháil ar chás inar tarchuireadh an tsaincheist seo chuig an gCúirt Uachtarach, mhol an Grúpa gur cheart don Aire breithniú na saincheiste seo a chur san áireamh ina chéad chlár oibre eile.

Cionta áirithe faoi Achtanna na gCuideachtaí

D'fhorbair an GADC critéir maidir le measúnú (agus rangú trí thagairt a dhéanamh do na ceithre ghrád pionóis mar atá molta i mBille na gCuideachtaí) a dhéanamh ar chionta nua arna gcruthú faoi dhlí cuideachta amach anseo²⁴

²¹ www.iaasa.ie

²² Tá cóip de Thuarascáil Bhliantúil 2011 GADC ar fáil ag www.clrg.org

²³ Coimisiún na Náisiún Aontaithe um Dhlí Trádála Idirnáisiúnta

²⁴ Tá na critéir sin leagtha amach ar lch 60 de Thuarascáil Bhliantúil 2011 GADC, atá ar fáil ag www.clrg.org

Oiriúnacht na scrúdaitheoireachta do chuideachtaí beaga

Chuir an GADC tús freisin le hobair ar a chlár oibre do 2012-14 i rith na bliana agus, sa chomhthéacs sin, rannchuidigh an Oifig le hobair an Choiste ar cuireadh cúram air scrúdú a dhéanamh ar an bhféidearthacht a bhaineann le socruithe scrúdaitheoireachta a bhfuil costas níos ísle orthu agus nach bhfuil chomh dian ó thaobh riaracháin de a thabhairt isteach do chuideachtaí beaga. Go sonrach, rinne an Coiste breithniú ar oiriúnacht na scrúdaitheoireachta lena húsáid ag cuideachtaí beaga agus mhol sé gur cheart cead a thabhairt do chuideachtaí beaga iarratas díreach a dhéanamh leis an gCúirt Chuarda in ionad na hArd-Chúirte le haghaidh scrúdaitheoireachta. Ina theannta sin, rinne an Coiste nós imeachta riaracháin simplithe agus neamhbhreithiúnach a d'fhéadfaí a mheas lena ghlacadh a leagan amach, faoi réir tuilleadh anailíse agus breithniúcháin ar na saincheisteanna beartais lena mbaineann agus faoi réir shainaithint na Gníomhaireachta iomchuí leis an nós imeachta a riar. Tugadh faoi deara freisin go bhféadfadh an tSeirbhís Dócmhainneachta a bunaíodh le déanaí a bheith ina Gníomhaireacht oiriúnach ina leith seo.

An Banc Ceannais

Tá Meabhrán Tuisceana i bhfeidhm go fadtéarmach idir OSFC agus an Banc Ceannais. Bunaithe ar a reachtaíocht forais, ligeann sé don dá chomhlacht faisnéis a tharchur chuig an gcomhlacht eile i gcás ina bhfuil siad sásta go mbaineann an fhaisnéis sin le sainchúram an chomhlachta eile. Cruthaíodh go bhfuil sé úsáideach go háirithe i gcomhthéacs imscrúdú leanúnach na hOifige ar imeachtaí áirithe ag an iarBhanc-Chorparáid Angla-Éireannach. Ina theannta sin, cuireadh cumarsáidí foirmiúla i leith cúig aonán ar leith ar siúl i rith 2012.

I rith 2012, d'óstáil an Banc Ceannais dhá chruinniú d'Fhóram Rialtóirí, mar ar tháinig raon d'oifigigh shinsearachta ó chomhlachtaí rialála éagsúla le chéile chun plé a dhéanamh ar chúrsaí leasa choitinn. D'fhreastail foireann na hOifige ar an dá chruinniú agus táthar ag súil go leanfaidh an fóram air teacht le chéile sa todhchaí.

Oifig na gCoimisinéirí Ioncaim

Is comhpháirtí tábhachtach don Oifig iad na Coimisinéirí Ioncaim a cuid oibre a chur chun cinn, go háirithe i ndáil le cúrsaí a bhaineann le dócmhainneacht. Sa chomhthéacs sin, tháinig an dá chomhlacht le chéile roinnt uaireanta i rith na bliana. Ina theannta sin, chomhroinn an dá chomhlacht faisnéis maidir le 10 gcúrsa ar leith (2011:30). Mar sin féin, leanann foráil a chuirtear san áireamh san Acht Airgeadais, 2011, uirthi tionchar a imirt go pointe áirithe ar éifeachtacht na socruithe comhroinnte faisnéise sin. Cuireann an fhoráil sin teorainn le cumas na hOifige faisnéis áirithe a fháil (agus, i gcás ina bhfuarthas í, í a úsáid) ó na Coimisinéirí Ioncaim. Cé go ndearna an Oifig iarrachtaí, trí idirghníomhaíochtaí leis na páirtithe lena mbaineann, ar an tsaincheist seo a réiteach, bhí an fhadhb, a dteastaíonn réiteach reachtaíochta uathu de réir thuiscint na hOifige, i réim go fóill ag deireadh na bliana.

Gairm na Cuntasóireachta

Imríonn gairm na cuntasóireachta ról tábhachtach i gcabhrú le hobair na hOifige, tríd an oibleagáid tuairiscithe éigeantaigh ar iniúcháirí cionta indíotáilte a bhfuiltar in amhras orthu a thuairisciú faoi Achtanna na gCuideachtaí agus tríd an tacaíocht níos leithne do theachtaireacht chomhlíonta na hOifige a fhéadann a bhaill a sholáthar dá gcliaint. Mar sin de, féachann an Oifig le hoibriú go dlúth leis na comhlachtaí cuntasóireachta chun tacú leo a chinntiú go dtugtar eolas iomlán dá mbaill faoina n-oibleagáidí tuairiscithe éigeantaigh agus insint dóibh faoin gcúnamh a fhéadann an Oifig a sholáthar do stiúirthóirí cuideachtaí agus d'oifigigh cuideachtaí.

Thionóil ionadaithe na hOifige dhá chruinniú fhoirmiúla le baill shinsearachta de bhainisteoireacht na gcomhlachtaí cuntasóireachta i rith na bliana. De bhreis ar na cruinnithe sin, d'oibrigh an Oifig leis an ngairm freisin trí Ghrúpa Tadhail Theicniúil, mar a bpléitear saincheisteanna de chineál níos teicniúla. I mí na Bealtaine 2012, rinne an Grúpa seo cur i gcrích ar obair ar fhoilseachán a ceapadh chun cabhrú le hiniúcháirí próisis na hOifige a thuiscint i ndiaidh dóibh tuairisc faoi chion indíotáilte a fháil²⁵.

Stocmhálartán na hÉireann

Thionóil an Oifig cruinniú foirmiúil amháin le baill shinsearacha de Stocmhálartán na hÉireann i rith 2012. Ar na cúrsaí a pléadh bhí an t-aistriú foirmiúil de dhualgais rialála áirithe ón Stocmhálartán chuig an mBanc Ceannais.

An Chomhairle Tuairiscithe Airgeadais – Coiste Comhairleach na hÉireann

Is éard atá sa Choiste seo, ar tugadh an Bord um Chleachtais Iniúchóireachta – Coiste Comhairleach na hÉireann air roimhe seo, ná grúpa comhairleach a fheagraíonn do thograí ón gComhairle Tuairiscithe Airgeadais, agus a sholáthraíonn ionchur ina leith, maidir le cúrsaí iniúchóireachta ó thaobh na hÉireann de. Chomhchruinnigh an Grúpa uair amháin i rith 2012 chun plé a dhéanamh ar thograí a bhí dírithe ar ábhar na dtuairiscí iniúchóirí ar ráitis airgeadais a fheabhsú.

Comhlachas Idirnáisiúnta na Rialtóirí Dócmhainneachta (“CIRD”)

Is comhlacht idirnáisiúnta é CIRD a thugann le chéile na heispéiris agus an saineolas atá ag rialtóirí náisiúnta dócmhainneachta ó 26 dlínse ar fud an domhain. Is fóram luachmhar é CIRD, a bhfuil an Oifig ina ball de ón mbliain 2003, le haghaidh teagmháil agus comhar idir a chuid ball a chur chun cinn agus le haghaidh faisnéis maidir le réimsí leasa choitinn agus deachleachtais a chomhroinnt.

Páirtithe leasmhara eile

De bhreis ar na grúpaí páirtithe leasmhara dá dtagraítear thuas, rinne an Oifig bualadh le/oibriú le raon grúpaí páirtithe leasmhara agus páirtithe leasmhara eile i rith 2012, lena n-áirítear Comhlachas Ghnóthas Beag agus Meánmhéide na hÉireann, Comhlachas na nGnólachtaí Beaga agus Institiúid na Stiúrthóirí.

Na meáin

Déileálann an Oifig leis na céadta ceist meán sa bhliain de ghnáth. Cé go bhfuil an Oifig aireach ar an ról tábhachtach a fhéadann na meáin a imirt in eolas a thabhairt don díospóireacht ar shaincheistanna dlí cuideachta, comhlíonta agus rialachais i gcoitinne, agus go ndéanann sí a dícheall, nuair is féidir, cabhrú leis na meáin trí dhéileáil le ceisteanna ginearálta, ní mór di a bheith an-chúramach agus í a dhéanamh. Cuirtear cosc ar an Oifig, faoi reachtaíocht rialaithe, aon ráiteas poiblí a dhéanamh maidir leis an déanamh imscrúduithe, seachas i ndáil le faisnéis a chuaigh san fhearann poiblí cheana. Ina theannta sin, tá an Oifig aireach ar na cearta atá ag daoine aonair agus ag daoine eile atá ag teacht os comhair na gCúirteanna, agus, dá bhrí sin, ní eisióinn sí tuairiscí ar dhul chun cinn ná aon fhaisnéis eile faoina gníomhaíocht forfheidhmithe i gcás ina bhféadfadh sí dochar a dhéanamh d'aon ghníomhaíochtaí dlí amach anseo.

Nuair is iomchuí, cuireann baill d'fhoireann na hOifige ailt chuig na meáin agus chuig foilseacháin eile. Rinne foireann na hOifige ailt a sholáthar nó a thabhairt don Sunday Business Post agus don iris Accountancy Plus i rith 2012.